

801 ex. vel Sed octo primates homines intraverunt cum episcopo nostro<sup>1</sup> die dominico in  
802 ecclesiam. Non illi octo, qui in propheta leguntur in gladiis et lanceis pascere terram  
Nemroth<sup>a,2</sup>, sed rapere reum et sanctitatem domus Dei profanare et sancti confessoris  
Christi Martini imminuere honorem; inruentes siquidem intra cancellos altaris. Quos  
expulerunt<sup>b</sup> fratres ante faciem altaris.

Si aliud dicunt, omnino falsum ferunt<sup>c</sup>. Quia illorum nullus caput tunc temporis  
inclinavit ad altare Dei.

Sonuit siquidem ante civitatem venisse hostem Aurelianensem ad profananda  
sancti Martini suffragia; quia sciebant commanentes per<sup>d</sup> villulas homines, exinde<sup>3</sup>  
venientes. Concursus fuit in civitate subito mendicorum ex omni parte, suum parati  
defensorem defendere; timor et tumultus ubique increpuit<sup>e</sup>. De quorum manibus  
fratres nostri eripuerunt praefati episcopi homines, ne quid mali<sup>f</sup> paterentur populum-  
que foras ecclesiam expulerunt.

Sed scio ante nominatum pontificem<sup>4</sup> multas dicturum<sup>g</sup> esse accusationes contra  
fratres nostros; et quae gesta sunt exaggerare; et plurima addere quae gesta non  
erant; sicut in eius legebatur litteris<sup>5</sup>.

Quapropter, filii carissimi, praecipiendo praecipio vobis, ut prostrati veniatis ante  
pedes domini mei David, imperatoris aequissimi et serenissimi; postulantes<sup>h</sup>, episcopo  
veniente, locum defensandi et disputandi cum eo: si iustum sit, ut vi raperetur de  
ecclesia ad easdem poenas reus, de quibus aufugit; et an aequum sit, ut, qui cesarem  
appellat, ad cesarem non adducatur; et utrum fas sit, ut paenitens et confitens sce-  
lera sua spoliatur omnibus bonis usque corrigiam calciamenti; vel si bene custodiatur  
illud dominicum verbum, quo ait: 'Superexaltat misericordia iudicium'.

In tali siquidem facto e contrario superexaltat iudicium misericordiam. Et ubi  
est multotiens laudata misericordia ab ipso domino nostro Iesu Christo, quae inter  
evangelicas legitur beatitudines: 'Beati misericordes, quoniam ipsi misericordiam con-  
sequentur'; item praeceptum dominicum: 'Estote misericordes, sicut et pater vester  
misericors est'? Item cautelam providam consideremus, ubi ait: 'Nolite condemnare,  
et non condemnabimini'; et alia multa, quae in evangelii<sup>i</sup> leguntur auctoritate de  
misericordia; et ipsius Domini verbo, ubi ait: 'Non veni vocare iustos, sed peccatores'.  
Quapropter peccatricem mulierem, quae sanctos tetigit pedes, non abhorruit<sup>k</sup>. [Quae  
non<sup>l</sup>] ex tactu obprobrium contulit Christo, sed insignia virtutis eius elicit; neque enim  
inmunditia eius polluit mundum, sed puritas mundi purificavit inmundam. Recordemur  
nos illius esse servos, qui, ductus ad crucem, pro crucifigentibus oravit.

Et quomodo venerabilis pater dicit reum peccatorem ecclesia non debere recipi?  
Si ecclesiam peccatores non inrant, fortassis sacerdos non invenietur, qui missas  
cantet in ea, neque<sup>m</sup> qui cantanti respondeat, nisi quislibet nuper baptizatus; dicente  
Iohanne apostolo: 'Si dixerimus, quia<sup>n</sup> peccatum non habemus, nosmetipsos seduci-  
mus et veritas in nobis non est'.

Sed eundem reum diabolum nominari in venerabilis episcopi litteris invenimus,  
non hominem. Non cogitas, quid apostolus ait: 'Nolite iudicare ante tempus'. Num-  
quid praescribimus potentiae Dei, ut misereatur cui vult, qui ait: 'Erunt novissimi  
primi, et primi novissimi'. Cuius sapientiae interpretationem in Iuda et latrone<sup>o</sup>. Ille

a) Nembroth P. b) expoluerunt P\*. c) fuerunt P. d) ex P. e) increbuit coni. J. f) male P.  
g) dicendas P. h) postolantes P. i) euangelio P. k) aborruit P. l) Quae non om. P. m) ne P  
(pro neque). n) quae P\*. o) habemus suppl. Frob.

1) Iosepho archiepiscopo Turonensi. 2) Michaeas 5, 5: et octo primates homines; 5, 6: et pa-  
scent terram Assur in gladio et terram Nemrod in lanceis eius. 3) ex urbe Aurelianensi. 4) Theo-  
dulfum. 5) quae litterae non iam reperiuntur.